

Bunita logro di Yahaira Maduro


Artista di Aruba a participa na un Expo te na Paris

ORANJESTAD (AAN): E actividad tabata planea pa tuma lugar na Francia na fin di Januari 2021. Sinembargo debi na pandemia y reglanan existente e momento ey, esaki a wordo cancela. Pero awor na September 2021 si el a tuma lugar.

Esnan cu conoce, sa cu semper Yahaira tabatin un pasion pa arte. Ultimo añanan por a mire ta pinta mas y mas, desaroyando su habilidad y dedicacion na esaki.


For di chikito caba e tabata gusta pintamento, y semper a usa colornan briyante. Despues di a studia y biba na Hulanda, el a regresa Aruba pa start su carera como un especialista Legal. Pero toch arte a keda como un di su berdadero pasion y den su tempo liber a cuminsa pinta bek usando principalmente acrilico y experimenta cu diferente estilo. Su cuadranan a wordo cumpra y ta dorna hopi cas y oficina na Aruba, Bonaire, Curacao, y Hulanda. El a hasta yega di diseña tarheta di mensahe, a crea costume pa carnaval, y a haci algun trabao pa e.o. Gobernador di Aruba y tambe Corte di Husticia.

Yahaira Maduro a profundiza su mes awor mas den arte abstracto y tabata basa nan mes segun varios tema. Pues e ta inclui e.o. colornan cu ta mas sobresali durante Carnaval, y asina e ta traha un cuadro abstracto cu e colornan ey. El a sigui cu temanan asina, y a inclui un cuadro contemporaneo cu colornan di ambiente di



anochi, otro cu colornan di ora bo sobreviví un tormenta, baile harmonioso, etc. E colornan keto bay ta vibrante y combinacionnan di colornan atrevido.





Lo mas interesante ta e hecho cu aña pasa algun conocedor di arte na Europa a tuma nota di su obranan y a logra drenta den contacto



cune. Di e forma ey a nace un comunicacion nobo unda a demostra e interes grandi pa e artista di Aruba cuminsa participa den expo cu tin na Europa tambe.

Yahaira a viaha pa Francia unda el a participa den e feria 'Art3F Paris International Contemporary Art Fair'. Esaki tabata den Paris Expo Porte de Versailles.

Segun Yahaira a indica na DIARIO, tabata un satisfac-



cion y felicidad pa mira su pinturanan 'Perla di Caribe' y tambe 'Joie de Vivre 297' poni mey-mey di asina hopi obranan bunita di arte di artistanan for di rond mundo.

Pa Yahaira Croes-Maduro, esaki sin duda ta habri caminda internacional pa su obranan di arte, y sigur ta entusiasma cu su obranan ta hayando admiracion te na Europa. E ta gradici e.o. Van Gogh Art Gallery di a represent'e na Europa. E ta

gradici tambe su amigonan Ryon Dijkhoff y Brio Croes cu a yude.

DIARIO a haya sa cu pa December, Yahaira lo bay tin su siguiente solo Exhibicion di Arte di mas obra nobo di dje, y sigur amantenan di obranan di arte abstracto lo keda encanta pa mira e ingeniosidad y creatividad di Yahaira riba su obranan, unda e ta demostra un excelente dominio riba control di color.